



吾學編

皇明名臣記

三

皇明名臣記

藏書印

皇明名臣誌序

書

卷

一

序

一

名臣有述久矣陸表呂宋迄於近代蓋拾數家咸足以襄前修而式後進但頌言其美者瑕瑜之義微摘書其事者始終之跡晦故今所記略倣史傳庶幾歲月可稽而先後不紊短長互見而法戒具存爾顧見聞寡陋遺缺者多尚有俟於後之君子云

嘉靖丙寅八月朔鄭曉識

海鹽夏儒刻

皇明名臣記目錄

一卷

中山徐武寧王

開平常忠武王

岐陽李武靖王

寧河鄧武順王

東甌湯襄武王

黔寧沐昭靖王

誠意伯劉文成公

二卷

學士宋文憲公

學士王忠文公

參政陶姑孰郡公

御史中丞章公

祭酒宋文恪公

大學士朱文恪公

三卷

號國俞忠烈公

越國胡武莊公

蔡國張忠毅公

梁國趙武莊公

泗國耿武莊公

永義侯桑公

太師丞相韓國李公

太子太師穎國傅公

四卷

靜誠陳公

祭酒樂公

祭酒劉公

祭酒陶公

太子少保唐公

尚書郁公

尚書詹公

尚書開公

大學士吳公

大學士吳公

學士劉公

五卷

河間張忠武王

東平朱武烈王

定興張忠烈王

平江侯陳恭襄公

漳國鄭忠毅公

鄞國薛忠武公

鄆國宋忠順公

廣寧侯劉忠武公

六卷

太師楊文貞公

太師楊文敏公

太師楊文定公

七卷

太師蹇忠定公

太師夏忠靖公

太保黃忠宣公

太子太師胡忠安公

尚書周文襄公

八卷

春坊大學士解公

少保黃文簡公

少師胡文穆公

少保金文靖公

太保高文義公

太常岳文肅公

九卷

太子賓客胡公

侍郎薛文靖公

侍郎呂文懿公

十卷

榮國姚恭靖公

尚書宋公

湯陰伯郭忠襄公

太子少師儀文簡公

尚書郭公

知府况公

都御史羅公

太子太保陳僖敏公

武功伯徐公

少保馬恭襄公

十一卷

太子少傅劉節愍公

少保陳節愍公

太傅曹文忠公

少保鄜忠肅公

十二卷

侍郎段公

都御史顧公

尚書耿清惠公

尚書年恭定公

都御史軒公

都御史魯公

尚書林恭肅公

都御史楊公

太子少保樊清簡公

都御史熊莊簡公

尚書陳公

十三卷

侍郎李忠文公

祭酒陳公

尚書魏文靖公

都御史吳文恪公

侍郎葉文莊公

尚書楊文懿公

太子太保張莊簡公

尚書謝文肅公

太子少保章文懿公

太子太保吳文定公

十四卷

學士劉忠愍公

寺丞鍾恭愍公

尚書廖恭敏公

尚書章恭毅公

知府劉公

按察使楊公

光祿卿陳恭愍公

十五卷

太師李文達公

太傅商文毅公

太傅彭文憲公

太傅徐文靖公

太師劉文靖公

前少師大學士楊公

十六卷

太保王文端公

太保王忠肅公

太師王端毅公

少保倪文毅公

太傅馬端肅公

太保耿文恪公

少保許襄毅公

十七卷

太傅于肅愍公

尚書王莊毅公

太子太保項襄毅公

太保余肅敏公

太子少保程襄毅公

少保秦襄毅公

少保胡端敏公

少保李康惠公

十八卷

侍郎錢文肅公

太子少保鄒文敏公

侍郎劉文介公

侍郎儲文懿公

太子少保邵文莊公

太子少保楊文恪公

祭酒魯文恪公

尚書崔文敏公

侍郎呂公

十九卷

聘君吳公

翰林檢討陳公

翰林修撰羅公

給事中賀公

郎中莊公

吏目鄒公

祭酒蔡公

二十卷

尚書王文忠公

太子少保周文安公

太常卿張公

太子太保林文安公

尚書王文莊公

太子少保傅文毅公

少保毛文簡公

二十一卷

太子少保李襄敏公

太子少保崔莊敏公

少保姚文敏公

太保尹恭簡公

二十二卷

太子少保彭惠安公

尚書何文肅公

太保周文端公

太保劉忠宣公

太傅韓忠定公

太子太保戴恭簡公

太子少保張簡肅公

二十三卷

尚書劉文安公

太傅丘文莊公

太保劉文和公

太傅謝文正公

太傅王文恪公

太保劉文肅公

少保石文隱公

二十四卷

懷遠伯山襄毅公

定襄侯郭忠武公

穎國楊武襄公

靖遠侯王忠毅公

都督王公

威寧伯王襄敏公

錦衣卒公

都督馬公

太保梁武壯公

二十五卷

都御史楊恭惠公

都御史韓襄毅公

太子少保鄧襄敏公

尚書雍公

尚書吳公

二十六卷

少保林莊敏公

尚書王恭毅公

尚書陳康懿公

都御史黃公

尚書黃文毅公

二十七卷

布政使夏公

都御史高公

大理卿夏公

知府張公

都御史王公

二十八卷

新建伯王公

尚書孫忠烈公

尚書許忠節公

二十九卷

少卿黃公

御史陳公

三十卷

太師李文正公

太保楊文襄公

太傅席文襄公

太師張文忠公

皇明名臣記目錄終

子履準校正

皇明名臣記第一卷

吾學編第三十二

中山徐武寧王

海鹽鄭曉

王名達鳳陽人幼倜儻沉雄有智畧年二十二從
上起兵授鎮撫周旋二年進諸將上乙未脫

上急從克和陽渡江下采石定太平擒陳也先丙
申從定建康下京口授鎮江翼大元帥轉江南樞
密同僉圍毗陵擒張九六敵復圍毗陵又破其援
兵丁酉克毗陵陞僉院轉攻下寧國戊戌取宜興
是年 上征婺州畱王守建康己亥池州捷聞升

奉國上將軍同知樞密院 上還遣西征皖城敗

趙普勝兵庚子伏敗漢兵池州吳陷宜興戰復宜

興辛丑升江南中書右丞從征江州友諒棄城走

武昌屯兵漢陽夏口遇友諒還守江州召歸友諒

即破江州中途遣王復守江州破友諒兵壬寅下

豫章西攻武昌豫章內變旋師討平之癸卯從

上援壽春破吳兵圍廬州會友諒大舉寇豫章從

上至彭蠡友諒逆戰王先諸將敗敵 上慮友諒

襲建康命王還守 上西征武昌甲辰升左相國

武昌平遂取廬州江陵常德夷陵衡州乙巳下淮

東郡縣丙午征吳麋戰皂林擒吳兵六萬直抵蘇

州築長圍架木塔與城中浮屠等築臺三層下瞰

城上設火筒發連中又設襄陽礮礮風着人皆死

城中震恐丁未遣人請事建康 上曰將軍天性

忠義沉毅有謀端重有武顧軍中稟命此賢臣事

君之道吾甚嘉將軍然將在外君不御自後軍中

緩急將軍便宜行吾不中制蘇城堅難猝破無錫

莫天祐又與士誠為聲援其部將楊茂善游水天

祐遣為偵邏卒獲茂王解茂縛待以腹心屢遣茂

游水往來盡獲其書報知城中困乏督兵急攻破

其城縛士誠送建康得兵二十五萬班師封信國
公是年冬為征虜大將軍帥諸將取中原 上曰
諸將非不健鬪然能持重師有紀律得為將之體
者莫如大將軍宜專中軍策勵羣帥運籌決勝不
可輕動遂克沂州降王宣取益都東郡濟南規畫
芻糧兵不民擾洪武元年正月 上即皇帝位加
中書右丞相信國公兼太子少傅是年克樂安遼
河入汴洛長驅嶠函抵潼關五月 上幸汴謁行
在所定計取元都渡河北收衛輝彰德廣平深趙
出臨清取德滄至直沽獲海舟聯橋濟師常將軍

都督張興祖率舟師並進步騎遵陸而前元丞相
也速等捍海口望風走遂克河西務入通州元主
北走八月至元都齊化門填壕登城王坐門樓執
其監國宗室淮王帖木兒不花及太尉左丞相慶
童平章迭而必失朴賽因不花右丞張康伯御史
中丞蒲川等戮之獲諸王璽封府庫圖籍故宮殿
分兵守妃主宮人令故奄護視秋毫無犯市肆不
移既而順德諸守將皆自山西來降承制立燕山
六衛守禦北平畧保定中山河間懷慶轉入山西
所過擇守要害進圖太原謂諸將曰聞擴廓帖木

見出太原道保安經居庸攻北平孫都督總六衛
兵足鎮禦我乘其不備直抵太原傾其巢穴彼進
不得戰退無所依所謂批亢擣虛也若彼還軍救
太原已爲我牽制進退失利必成擒矣諸將皆曰
善引兵徑進擴廓帖木兒至保安聞之果還兵鋒
甚銳王遣精兵夜襲其營擴廓帖木兒聞變倉卒
急踰帳乘驛馬遁去遂克太原遣薛顯傳友德擊
賀宗哲于石州平忻霍平陽二年取鹿臺河中西
安鳳翔會諸將議兵所向諸將皆曰張良臣才不
如李思齊慶陽易於臨洮先取慶陽從隴西攻臨

洮便王曰不然慶陽城險兵悍未易猝拔臨洮西
通蕃夷北界河湟人足備戰鬪土足以供軍儲今
以大軍蹙之思齊不西走胡束手就降矣臨洮旣
克旁郡自下諸將曰善進至鞏昌遣副將馮宗異
征臨洮思齊不戰降良臣懼亦以慶陽降王西征
平涼良臣復叛王趨至涇原遣將率精騎抄其出
入絕聲援別將圍其城良臣開門挑戰王麾兵擊
敗之其下開門納我兵王入城良臣投井引出斬
之陝西悉平三年總兵征沙漠至於定西遣將取
興元西平土蕃征哨極於西北始還是冬大封功

臣進魏國公授開國輔運推誠宣力功臣特進光祿大夫左柱國太傅中書右丞相參軍國事食祿五千石與世券四年賜王及常李鄧馮四公佃墳儀仗戶表王里曰大功五年北征還命沿邊輯守十七年鎮燕召還冬疾作明年二月卒年五十四贈中山王謚武寧 上爲神道碑文王言簡慮精當提兵時令出不二諸將敬若神明受命而出功成而旋不自矜伐至於封姑蘇府庫置胡宮美人財寶無所取婦女無所愛可謂忠志無疵昭光天日者也侑享 太廟肖像功臣廟位皆第一子四

輝祖添福增壽膺緒長女 仁孝皇后次代王妃次安王妃輝祖初名允恭 上賜名輝祖身長八尺五寸洪武二十一年嗣二十六年遣諭燕防胡明年練浙江海上兵防倭二十九年會禮部翰林院試國子師生第優劣移吏部以次錄用輝祖嘗侍 懿文太子學通經書大義從詹希元學書善大字建文君即位特見信任靖難兵起與齊黃盧振張昺葛誠通謀議督諸兵北進屢有功召還文皇即位勒罷尋幽繫永樂三年勅禮部歲五祀王著令五年輝祖卒年四十 上曰輝祖與齊黃

輩謀危社稷齊黃輩論死念中山王平定天下有大功於國家曲赦輝祖輝祖病死中山王功不可無後令輝祖子嗣魏國公通給中山王歿後祿輝祖子釋迦保見 上賜名欽乞守墓南京 上怒謫居中都二十二年卒洪熙元年子顯宗嗣正統十二年卒弟承宗嗣天順元年守備南京七年卒明年子備嗣守備南京正德十二年卒贈太傅謚莊靖長子奎璧未嗣卒十三年奎璧子鵬舉嗣

開平常忠武王

王名遇春懷遠人性剛直膂力絕人乙未來歸乞

前部先鋒自效 上曰爾來就我食我安得爾留王請再三涕泣伏地不起 上曰從我渡江俟克太平委身事我未晚比抵采石元兵陣磯上下聯大舟距三丈許相顧莫敢先登王後至 上麾之前即捨舟挺戈大呼一躍而登衆披靡遂拔采石取太平授總管先鋒陞管軍總管丙申蠻子海牙屯江上王設疑兵分其勢正兵合戰出奇敗其中堅尋守溧陽攻建康先登從徐將軍克鎮江爲先鋒再攻常州會青軍叛與吳合圍徐將軍牛塘急王力戰解圍擒吳徒將張德陞統軍大元帥明年

克常州遷中翼大元帥從下寧國池州又明年擢
都督馬步水軍大元帥又明年轉鎮國上將軍同
僉書行樞密院事守婺城攻降衢州陞僉院又攻
杭州庚子召還從拔安慶趙普勝水寨漢人言且
援安慶王曰必攻池州賊誤我留羸弱守城出銳
士伏九華山漢兵果攻池州伏起俘斬萬人又敗
友諒兵龍灣 上禦友諒王留守辛丑陞江南行
省叅知政事從 上取安慶破江州還守龍灣吳
寇長興援之敗吳兵壬寅羅友賢據神山寨通吳
動杭欵癸卯討斬友賢吳圍劉福通安豐從 上

擊吳突入陣三戰三勝敵大敗去遂圍廬州漢攻
南昌解圍還從 上援南昌遇彭蠡湖連舟力戰
呼聲動天地縱火焚偽平章舟風急火熾湖水盡
赤敵梟將張定邊前迎戰王射中定邊走友諒退
保鞋山諸將曰漢兵尚強且縱去圖再舉王在
上旁獨不言我師出湖口皆言江流急欲放舟下
上知諸將怯令舟盡扼上流王獨應曰善率諸
將溯流並上控湖口旬有五日友諒食乏出求戰
王遣火舟火筏禦之敵奔潰追北數十里酣戰自
辰至未不解 上乘舟及王舟皆膠沙王力脫

上舟舟被圍又復力戰得脫是役也竟殲友諒進圍陳理武昌甲辰理降陞平章政事從取廬州自將平臨江攻贛州擒熊天瑞乙巳定南安南雄韶州尋取安陸襄陽從徐將軍克泰州丙午克高郵淮安濠泗徐宿安豐會諸將攻浙西次太湖擒逆戰尹萬戶趨湖州水陸鏖戰敵潰抵城下晝夜環攻吳張士信屯舊館出我師背王統奇兵由大全港入結營東阡復出敵背士誠急出親兵拒鬪輒敗復遣將徐義統亦龍船來援又敗降烏鎮舊館下湖州進圍平江丁未圍益急士誠背城戰敗縛

士誠加授平章軍國重事封鄂國公爲征虜副將軍從大將軍北伐 上即位之歲加上柱國兼太子少保從下山東汴梁進攻河南敵兵五萬屯洛北迎戰王布陣既定單騎執弓矢馳入陣敵二十騎攢槊刺王王一箭中其前鋒大呼殺入悉獲其衆河南諸城先後皆平 上幸汴計取燕都從下河北諸郡遂定燕都下保定中山真定師次太原守將擴廓帖木兒帥銳兵逆戰王曰我騎兵雖集步卒未至若遣精騎夜劫其營衆可亂主將可縛也大將軍從王言擴廓帖木兒中傷遁二年攻大

同平河東遂西入秦張良臣遁李思齊迎降盡平
關隴元將也速侵通州王還兵拒戰遂擣永平過
惠州至大寧也速遁破開平元君北奔追至北河
俘宗王三人及平章昇住等全師還燕次柳河川
卒年四十贈翊運推誠宣德靖遠功臣開府儀同
三司上柱國太保中書右丞相開平王謚忠武喪
至龍江 上為文往祭曰朕開拓之功遇春十居
七八召宋濂為神道碑文侑享 太廟王謙慎不
矜有功無過運籌決勝不學而能其從大將軍謹
聽約束及秉鉞專征即能制節將校所向克捷時

在 上前屢有直諫其妻藍玉兄弟也長子茂洪
武三年以父功封鄭國公與世券二十年從馮勝
出塞征納哈出勝械茂至京茂本勝婿勝言茂驚
潰納哈出衆降人茂亦言勝短 上召勝還奪總
兵印罷朝請茂安置龍州次昇二十一年封開國
公次森皆 上所賜名長女為 皇太子妃二十
四年茂卒於龍州無子靖難兵至浦子口昇及魏
國公分道力戰已而昇見 文皇得釋昇子繼祖
坐事謫雲南臨安永樂二年召至京賞鈔幣遣歸
謫所繼祖六子長子寧寧子復弘治五年詔錄

太廟元祀功臣後曰此其人佐 太祖平定天下
有大功今其子孫不沾寸祿夷於阡隸朕不忍焉
其加恩承祀於是復及李鄧湯三家後皆得爲南
京錦衣衛世指揮使復卒子經嗣經老子鳳嗣鳳
卒子玄振嗣嘉靖十年進劉基侑享 太廟并議
常李鄧湯四王後十一年吏部會議遇春文忠愈
和皆戮力中原廓清方夏曾不再傳而子孫微替
歲月彌久莫敢訟功逮我 孝宗憫焉下詔錄其
裔孫四人爲錦衣衛指揮使 皇上神聖天啓動
遵 祖法特詔誠意伯劉基裔孫世壽又推念四
臣之功俾悉如基議從事廣祖宗崇德報功之仁
修聖王興滅繼絕之典臣等愚昧謂四臣宜世其
爵 制曰可封常玄振懷遠侯李性臨淮侯鄧繼
坤定遠侯湯紹宗靈壁侯各食祿千石與世券嘉
靖二十七年玄振卒

岐陽李武靖王

王名文忠盱眙人初名保保父貞尚隴西長公主
以駙馬都尉封思親侯贈隴西王謚恭獻王生十
二喪母甲午駙馬攜至滁見 上上見甥喜且泣
賜姓名朱文忠丁酉以舍人統兵援池州戊戌攻

下太平破苗獠于於潛昌化王恐士卒驕莫肯鬪
因激衆怒盡焚輜重進次淳安夜襲破賊營取嚴
州授帳前總制親兵都指揮使兼領元帥府事守
嚴州吳率苗獠水陸奄至出奇大敗之置斬馘巨
筏上放中流下誓水賊賊遁去取浦江禁焚剝示
恩信民大悅同僉貪成率苗將蔣英劉鎮三萬人
降己亥會胡大海攻拔紹興諸暨吳又攻嚴州王
縱兵出小埭門過鮑婆嶺破賊碧溪塢又破之胥
口遣元帥何世明克分水吳陸元帥者復據分水
遣世明斬陸元帥陞同僉行樞密院事守嚴州辛

丑漢李明道攻廣信王援之擒明道降漢建昌守
將王溥壬寅蔣英劉鎮反金華王馳赴蘭谿賊遁
入武林遂定金華處州苗將又反王調兵屯縉雲
遏侵軼陞浙江行省左丞總制嚴衢信處諸會諸
軍王調胡德濟往援賊敗去癸卯謝再興叛降吳
引之寇東陽王晝夜馳百六十里逆敗賊義烏遂
築新城五指巖下留德濟城守未幾吳將李伯昇
攻城城堅不可拔去甲辰陞右丞乙巳伯昇復寇
新城王未至新城十里營龍潭新城守將遣人間
道言衆寡不敵且避賊鋒俟大軍王曰以衆則我

非彼敵以謀則彼非我敵吾未戰輒退賊勢益熾莫若與戰遂下令曰彼衆而驕我少而銳以銳當驕可一戰擒也賊擒輜重皆汝等有明日合戰王持槊引數十騎乘高馳下直出賊後衝其中堅敵列騎迎戰王格殺數人出入陣中披靡督衆乘之敵潰城中將士出夾擊斬首數萬溪水盡赤丙午總水陸兵下江浙克桐廬新城富陽至餘杭謝再興子五人嬰城固守合圍一日而拔守將潘原明遣方彛請降王引入卧内欵接因命條畫入城次第遣歸原明封府庫籍兵餉執劉鎮蔣英出降王

宿城上今日敢有擅入民居者斬有一卒借民釜立磔狗即軍中加浙江行中書省平章政事復李姓洪武元年平閩賊二年爲偏將軍副常將軍北征出遵化度鹿兒嶺敗江文清錦川次會寧元將也速逆戰敗追至樂河斬其宗王慶生遂進攻大興設伏斬其將鼎住克上都常將軍卒詔王爲大將領其衆西援慶陽至太原聞元兵攻大同急遂移兵至鴈門馬邑元邏卒數千猝至王接戰擒平章劉帖本進次白楊門又擒虜四大王時天雨雪王疑有伏引數騎入山覘虜前軍營去敵五十里

王至今前徙五里阻水爲營是夜元將脫列伯果
悉銳劫我王令將士秣馬蓐食堅壁不動先以兩
營誘敵督令死戰自寅至辰度其飢疲分軍爲左
右翼自爲前鋒奮擊大破虜擒脫列伯進兵東勝
州莽哥倉不見虜而還三年授征虜左副將軍總
兵北伐出野狐嶺降其守將至察罕惱兒擒平章
祝貞敗太尉蠻子平章沙不兒朶兒只八刺遂進
次開平獲平章上都罕克應昌獲元君孫買的里
八刺及后妃諸王達官宋元璽金寶玉圖書玉冊
鎮圭大圭玉竿玉斧元太子愛猷識理達臘脫身

遁還過中興擒江唐國公進攻虹螺山降楊思和
班師至龍江駕出勞江上王上平沙漠表是年大
封功臣授開國輔運推誠宣力武臣特進榮祿大
夫右柱國大都督府左都督曹國公同知軍國事
食祿三千石與世券四年鎮撫成都五年佐大將
軍北征王總東道兵取和林師進可溫至哈刺莽
耒虜遁去王曰兵貴神速千里襲人難多重負乃
留韓政駐輜重驢駒河持二旬糧兼程至土刺河
元哈刺張蠻子起營渡河列騎待我王力戰馬中
矢急持短兵接俄得指揮李榮馬王橫槊馳麾諸

兵殊死戰虜敗走又追至騁海虜來益衆王據險
爲營示弱疑虜遁去軍還失故道之水多渴死大
窘王出哥兒麻思野尋水脉忽所乘馬足跑地泉
湧出六年將屯朔州擒元太尉伯顏不花七年總
兵北伐駐代遣將分道出捕虜擒元平章國公攻
大寧高州大石崖斬其宗王朶朶失里至豐州追
斬魯王十二年理軍河岷洮鞏十三年召還叅贊
軍國重事十六年兼領國子監事十七年卒年四
十六贈岐陽王謚武靖侑享 太廟王器量沉闕
人莫測其際臨陣蹈厲奮發遇大敵膽氣益壯好

學飭行釋兵家若恂恂若儒士子三人皆 上賜
名長景隆小字九江次都督增枝次正留守芳英
洪武十九年景隆嗣 上嘗書體爾祖禰忠孝不
忘字賜景隆使讀書友儒生一時韋布有名天台
林右輩皆與遊二十五年兼太子太傅建文君即
位與嗣魏國公以元勳子並見倚任靖難兵起代
耿炳文爲征虜大將軍乘傳至德州收集炳文將
卒盡調各路兵五十萬進營河間 文皇語諸將
曰李九江秦養少年未嘗習兵見戰陣輒付兵五
十萬是自坑也景隆率衆二十萬圍北平再戰鄭

村壩皆敗匿不聞明年又聚兵號百萬軍德州郭英吳傑等營真定逼北平又敗退戰白溝河又連敗兵將潰散南奔滄德州皆失守景隆遂奔還不誅靖難兵次江上景隆歸附得進太子太師增祿千石尋修太祖實錄充總裁官永樂二年周王發其建文君時嘗至邸即訊受賂羣臣又劾景隆與弟增枝匿亡命宥不問又劾革爵沒其家錮下獄四十五年而卒景隆子佑佑子萼萼子璿弘治中得爲南錦衣指揮使卒子濂嗣濂卒子性優給續封臨淮侯嘉靖十二年卒無子明年濂弟沂嗣

沂卒

寧河鄧武順王

王名愈虹人狀貌魁梧有勇力智畧過人父順與兄隆聚衆臨濠相繼卒衆推事王時年十六每戰必挺身破敵乙未率衆來歸充管軍總管從渡江克采石太平與徐將軍以奇兵擒陳也先丙申從定金陵破鎮江陞元帥守廣德丁酉移戍宣州取徽州破敵兵戊戌取婺源嚴州淳安轉僉書行樞密院事己亥略浙西臨安大破吳人閑林寨庚子鄱陽院判于光左丞余椿擊走僞漢部將辛同知

取饒州來附王移鎮饒饒濱彭蠡湖接漢界漢數
遣舟師攻城王輒出戰殲其衆辛丑除江南行省
叅政兼僉院總制各翼軍馬襲浮梁取樂平敗蕭
總管擒彭萬戶饒境悉定壬寅鄧克明據撫州僞
降欵我王卷甲夜趨旦入城克明單騎遁王號令
嚴秋毫無犯民爭獻酒食悉却不受是時 上討
友諒江州敗友諒走遂下江西至南昌授王江西
行省叅知政事鎮洪都癸卯友諒圍洪都王固守
挫賊相持三月 上率援兵至湖口友諒懼解圍
退大戰康郎山友諒竟敗死甲辰新淦叛擒其首

賊從常將軍平臨江諸山寨圍贛州乙巳降賊大
瑞平南安南雄韶州討熊勳臣於安福軍掠民子
女判官潘景告王王下令禁輯進江西右丞加湖
廣行省平章移鎮襄陽西抵巴蜀北控河洛烽火
相望新附之民未有定志 上賜王書曰汝謹法
度施惠愛無罪者勿妄殺有罪者宜詳審古良將
以仁義爲先勇略次之汝能勉焉我無西顧之憂
矣吳元年陞右御史大夫洪武元年兼太子左諭
德充征戎將軍取江淮未附州郡攻唐州取南陽
擒蔡國公史克新降隋州取金商鈞房三年爲征

虜左副將軍從大將軍平秦隴降河州朶甘烏斯
藏封衛國公授開國輔運推誠宣力武臣特進榮
祿大夫右柱國參軍國事食祿三千石與世券五
年爲征南將軍討溪洞蠻夷九年土蕃川藏遮掠
烏斯藏使者改征西將軍進討十年督副將分兵
三道併力覆巢穴窮追至崑崙山斬首功多獲馬
牛羊二十餘萬召還至壽春卒年四十一贈寧河
王謚武順侑享 太廟極至三山門 上臨奠爲
視葬地嘆曰愈事朕二十二年歷鎮八州有功無
過命朱夢炎爲文刻神道碑王器量宏偉沉毅簡

重謙恭慎密孝友純備臨敵不懼有功不矜禮賢
下士寬惠愛人長子鎮羽林鎮撫改封申國公十
八年征江西有功卒無子次銘西安護衛指揮鏞
旗手指揮使女妃秦王銘征蠻卒子源永樂元年
乞嗣以年二十爲散騎舍人七年征胡有功還卒
子挺亦卒挺子炳成化十六年乞嗣不許弘治中
始得爲南錦衣指揮使老子繼坤嗣續封定遠侯

東甌湯襄武王

王名和鳳陽人幼有奇志嬉戲常習騎射指揮群
兒及長身長七尺侖儻饒智畧壬辰率壯士從滁

陽王時 上在甥館王委心推翊爲萬夫長攻滁授管軍總管乙未 上取和州諸將多滁陽貴客部曲驕顧望不肯用命王獨恭謹受約束下采石定太平陳也先康將軍水陸分道寇太平王擊其水軍矢中左臂益奮大戰擒也先分兵取溧水句容丙申 上定建業王從徐將軍取鎮江陞統兵元帥轉同僉樞密院事丁酉守常州取江陰明年吳寇常州力戰却敵壬寅從攻無錫癸卯大破士誠兵錫山斬其梟將還拜中書左丞甲辰吳士信圍長興會常將軍兵合戰大敗士信遷中書平章

乙巳擊斬江西劇盜姚大膽取永新還守常州丙午與諸將伐士誠畧太湖營舊館降吳呂左丞轉戰湖州守將張右丞降進擊吳江克姑蘇陞左御史大夫兼太子諭德方谷珍據台溫慶元王督諸軍征之谷珍匿海島王遣人持書諭降谷珍乘勝下福州洪武元年延平陳友定令副校降我觀望持兩端王虜以歸是歲從駕幸汴與馮勝取懷慶澤潞晉絳三年從大將軍拔河中入潼關趨鳳翔越六盤盡平關隴明年與諸將至定西襲擴廓帖木兒取寧夏至察罕惱兒獲其猛將虎陳定東勝

大同宣府封中山侯授開國輔運宣力武臣榮祿
大夫柱國食祿千五百石賜券四年討明昇王與
傅將軍統諸將西征蜀王破瞿塘峽擣僞都降明
昇五年從大將軍北征窮追至和林還駐通州八
年鎮彰德是冬追伯顏帖木兒察罕惱兒十年加
號推誠位特進左都督左柱國進封信國公議軍
國事加祿至三千石賜世券明年巡撫西河州十
四年從大將軍北伐下灰山又明年經理四川永
寧塘壕士馬十八年討平五關山獠還朝乞骸骨
賜寶鈔造第鳳陽尋諭王曰日本小夷屢擾東海

上卿雖老強爲朕行視要地築城增戍固守備王
行築海上城起登萊抵江浙凡五十九城民丁四
調一爲戍兵二十年還京二十一年新第成率妻
子辭去二十三年賀元旦京師感疾遣歸里是年
召至京歸二十七年上思王特詔輿入覲明年
卒年七十贈東甌王謚襄武侑享太廟王沉毅
質直勇而善斷不妄發言入聞國論一語不泄行
師受任奉詔即行不少顧家臨敵果敢堅忍未嘗
挫衄有語及兵書者輒笑曰臨陣決機在智識敏
達何泥古爲家蓄媵妾百餘暮年皆資遣歸賞賜

多惠鄉鄰父老及孤寡無告者子五人鼎立功陞
督府僉事征雲南卒贈信世子輓太原護衛鎮撫
萬燮早卒醴督府同知征五開卒女妃魯王鼎子
晟幼優給永樂元年卒子文瑜文瑜子傑皆病廢
不得嗣傑子倫倫子紹宗弘治中得爲南錦衣指
揮使續封靈壁侯嘉靖十四年卒子佑賢嗣王孫
胤勤居丹徒景泰元年巡撫周忱薦其才授錦衣
百戶尋陞正千戶從楊善趙榮使瓦剌還陞指揮
僉事克叅將守延綏虜寇邊遇害胤勤才志敏捷
知兵善談論能文詞

黔寧沐昭靖王

王名英定遠人八歲喪母無所歸上憐之撫爲
子賜姓朱王天資忠孝厚重簡默齟齬不喜狎戲
壬寅年十八授帳前都尉守京口甲辰轉廣武衛
親軍指揮使改廣信衛洪武元年取鉛山崇安遂
從大將克延平擒陳友定拔閩溪十八寨縛馮谷
保復沐姓守建寧節制邵武延平三年僉大都督
府事四年陞都督同知九年鎮撫關西十年克征
西副將軍總京畿兵伐蕃部川藏抵崑崙山俘十
三萬封西平侯賜號開國輔運推誠宣力武臣食

祿二千五百石授券十一年授征西將軍征西蕃
朶甘降其萬戶迄失迦夷其部落擒洮州蕃酋獲
馬牛羊二十萬還鎮關中十三年元脫火赤愛數
擾邊總兵畧亦集乃路渡河經寧夏歷賀蘭山涉
流沙至虜營五十里分軍襲其背掩其左右王當
其前夜銜枚合進擒脫火赤愛還鎮關中十四年
出古北口克灰山會寧過驢駒河獲知院李宣還
京克征南將軍副傳將軍討元孽梁王把匝剌瓦
爾彌于雲南每戰先登擣中堅下烏撒畢節十五
年畧建昌潞江臨安沅江尋甸楚雄洱海大理二

龍關取鶴慶麗江金齒車里平緬來附未幾烏撒
東川建昌叛雲南諸蠻乘之亦叛王赴援賊遁是
年諸將班師留王鎮雲南定貢賦均力役踈其節
日寧便其人十七年平廣南蠻二十年誅浪穹鶴
慶劍川逋寇二十一年平緬衆三十萬寇定遠率
兵進討馮誠領前軍竄正湯昭爲左右大戰左軍
小却王令左右斬左軍帥首左帥遙見一人拔刀
馳下即麾衆復前王責戰益急不移時寇大敗東
川蠻叛據烏路山山極險峻上下三百里遣竄正
討降之復叛悉誅之廣西阿赤部結越州酋阿資

叛討誅阿赤降阿資明年春阿資復叛遣竊正討之降阿資母是冬入朝宴奉天殿還鎮二十三年遣兵討平教化三部及普安酋密即二十四年平順寧蠻阿資復叛帥兵進討阿資走諭還鎮以僉都督平羌將軍竊正爲參將領王兵阿資遣子降初王留鎮之明年哭 孝慈皇后再鎮之三年哭懿文太子極哀感疾卒年四十八贈黔寧王謚昭靖侑享 太廟王寬弘沉毅謀慮深遠臨事果斷凡得 上賜悉給將士鎮雲南簡官僚剔姦蠹撫農興學墾田治水嚴城堡謹斥堠通鹽井來商旅

軍食盈足恩威並施愛讀通鑑綱目大學衍義不釋卷子四人春晟昂斯斯駙馬都尉昂嘗以都督守雲南卒贈定邊伯謚武襄春年十七從父征討有功授督府僉事大臣請且試春 上曰兒本我家人昇實授嘗錄囚烈山審逆黨蔚州開釋各數百人二十五年奔父喪還嗣侯鎮雲南留意屯田水利平緬甸東川叛夷復平越雋阿資刀干孟諸砦三十一年卒年三十六建文君憐春謚惠襄春無子是年九月弟晟以都督嗣永樂六年晟平交趾功封黔國公食祿三千石與世券留鎮宣德元

年王通言交人復反晟總兵興安伯徐亨新寧伯
譚忠左右副總兵會柳升討賊三年廷臣劾晟
上封劾章示晟正統三年征麓川明年班師至楚
雄卒贈定遠王謚忠敬又明年子儼賜名斌嗣晟
征思任發斌在行景泰元年斌卒謚榮康三年子
琮幼優給以其從兄都指揮璘爲都督同知總兵
鎮雲南胡誌左參將協守璘卒弟瓚繼之成化元
年琮嗣弘治九年卒謚武僖無子明年姪孫崑爲
後十年請嗣公廷議崑始祖英封西平侯侯仲子
晟嗣侯以平交趾功封黔國公子斌孫琮嗣公琮

無子以崑爲後崑高祖昂寔英之子晟之弟崑宜
嗣西平侯不得嗣黔國公下雲南守臣議皆言百
餘年來雲南人習知黔國公一旦改西平侯似非
所以定民志而懾夷情也朝廷從之崑得嗣公留
鎮正德十四年卒謚莊襄又明年子紹勛嗣留鎮
嘉靖十四年卒子朝輔嗣留鎮二十六年朝輔卒
孝陵初起多畜養子每郡邑下輒遣養子出守蓋
二十餘人而昭靖王功最大有徐司馬者揚州人
九歲棄道旁上得之名馬兒旣長出入侍左右
征行守禦有功歷陞都督僉事司馬好文學謙恭

禮下士大夫浙東河南尤著惠政得人歡心公暇
退居一室蕭然如韋布及卒家無餘資稱賢將云
又有何文輝滁人初名道舍守宣城潼關成都北
平雁門從征淮東姑蘓福建陝西四川尤有功建
寧時建寧人降文輝主帥胡廷瑞怒欲屠其城文
輝力止之曰吾與公奉命安百姓乃以私忿殺人
耶遂止朱文遜者從定江左淮南有功授元帥拒
漢兵戰死朱文剛初名柴舍從定江左授元帥與
耿再成守處州苗帥叛文剛急收兵出戰揮劍斫
賊大罵死文遜文剛未詳何許人

誠意伯劉文成公

公名基字伯温青田人年十四通春秋能文章長
務理學尤精於天文兵法舉進士丞高安以廉節
名揭傒斯見而竒之曰此魏徵之流而英特過之
濟時器也江西行省辟掾史議不合去隱居力學
嘗遊武林西湖有異雲起西北魯道原字文公諒
皆謂此慶雲公獨縱飲不顧曰此天子氣應在金
陵十年後有王者起其下我當輔之方谷珍反海
上省憲舉公爲行省都事公議方氏首亂宜捕斬
行省請撫谷珍授官駁公擅作威福羈管紹興已

而方氏橫莫能制行省悟是公議上軍功爲行樞
密院經歷經畧使李谷鳳奏授處州總管府判公
薄其官棄歸田著郁離子十卷客或說公今天下
擾擾以公才畧據括蒼併金華明越可折簡而定
方氏將浮海避公因畫江自守此勾踐之業也公
曰吾平生忿谷珍士誠輩所爲謝客去會 上定
括蒼指乾象曰此天命也豈人力耶孫炎以 上
命遣使來聘遂間道詣金陵陳時務十八策適陳
氏入寇獻計者或曰降便或曰鍾山有王氣奔據
山便或曰決死一戰不勝而走未晚公獨不言

上召問公對曰先斬主降議及奔鍾山者乃可破
賊 上曰先生計將安出曰臣計莫若傾府庫開
志誠以固士心且天道後舉者勝宜伏兵伺隙擊
之取威制敵成王業在此時也 上喜用公言奮
擊大破之 上賞公辭不受中書省設座奏小明
王公大怒罵不拜曰何爲奉牧豎者爲因上陳天
命所在 上大感悟遂定計取天下攻皖城不援
公言宜逕拔江州 上悉軍西上友諒走洪都將
胡廷美遣子約降請禁止若干事 上初有難色
公躡坐 上悟許廷美竟降洪都初公聞母喪

上再三書慰留公不得已從征至是辭歸遣官護
行時苗賊反金華括蒼殺守將衢州謀翻城應賊
守將夏毅大懼會公至迎公即發書金處諸下邑
固守指授諸軍復處州擒賊方氏素畏公遣致書
禮不受使人白 上上令公與通問公宣示國家
威德方氏遂納土貢公上京出嚴州適吳寇至李
將軍欲奮擊公曰勿擊不出三日賊自走追而擊
之此成擒也比三日黧明公登城望曰賊走矣輒
使進兵追擒賊于東陽當是時漢吳爲敵衆謂蘓
湖地肥饒宜先取公曰士誠自守虜友諒居上流

且名號不正宜先伐漢漢滅吳首囊中物耳會漢
再攻洪都 上遂西征大戰彭蠡湖勝負未決公
密言移軍湖口期以金木相犯日決勝 上皆從
之滅漢還 上議取吳牧中原公密謀居多以公
爲太史令尋改爲太史院使上戊申大統曆熒惑
守心群臣懼公密奏宜罪已回天意 上爲引咎
諭廷臣又疏請早定法制吳平後張昶使人上書
頌功德勸及時娛樂公曰是欲爲趙高者 上頷
公言昶憾公嗾齊翼岩中傷公未及發昶誅已而
司天臺災翼岩上公天文事不知其本 上命

也 上怒窮治得與昶交通狀殺翼若 上督責
李丞相憲使凌悅遂彈丞相公爲 上言善長勲
舊且能輯和諸將 上曰善長欲害汝者數矣汝
乃爲之地耶汝忠勲足任此公頓首曰是如易柱
必得大木乃可若束小木爲之將速顛覆臣駑鈍
豈堪此大任吳元年拜御史中丞議律會章濫奏
上處州下縣賦比宋畝加五合 上令青田科止
五合曰使劉伯溫鄉里子孫世世爲美談或言有
殺運三十年者公慨然曰使我任其責掃除弊俗
一二年後寬政可復 上幸鳳陽公居守公志在

澄清天下言於 上曰宋元以來寬縱日久當使
紀綱振肅而後惠政可施命憲司糾察諸道彈劾
無所避因發中書省都事李彬罪狀誅彬中書省
大恨 上還京公曰鳳陽雖帝鄉非建都地王保
保雖可取然爲力甚難是秋請告歸後定西失利
王保保竟走沙漠 上手詔敘公勲伐召至京稱
公孔明之儔累欲封公謝曰 陛下乃天授臣何
敢貪天功回辭 上因卜相楊憲汪廣洋胡惟庸
公對三人皆不可相三人者聞之皆恨公三年加
弘文館學士封誠意伯授開國翊運守正文臣護

軍食祿二百四十石四年賜老。上手書問天象。公條答言霜雪之後必有陽春。今國威已立。自宜少濟以寬。先是公遣子璉論談洋巡檢司事。得旨竟下政府。胡左丞署省事。劾公請捕璉。上不問。會海豪通政府。訐言公欲得王氣地。輒移巡檢署。談洋有異圖。下政府議刑部論坐公死。上不報。移書論公曰：君子絕交惡言不出。忠臣去國不潔其名。又曰：明哲保身。覬覦作孽。今念卿功僅奪卿祿。伯壽如故。公得書大懼。走詣闕謝罪。乞留京師。已而。上疑稍釋。八年賜告歸。又手書慰藉。未幾。

卒年六十五。公病時集諸天文書鑰。匱中授子璉。勿開緘。且戒勿習。俟服闋即馳。上又曰：上或息。我問遺言。願修德省刑。祈天永命。諸形勝要害。宜與京師聲勢聯絡。比公計至。上急遣御史李鐸。至青田索公天文諸書。璉奉匱出授使者。隨見上。授考功監丞。久之御史中丞涂節言公死遇毒。汪丞相宜知狀。上問廣洋謝不知。上以罪胡丞相貶廣洋。公剛毅慷慨。有大節。論天下安危。義形于色。與人交。開心見誠。至義所不可無。少假借。上察公誠任。以心膂。公自謂不世之遇。知無不。

言每遇急難勇氣奮發計畫立就人莫能測其機
家居飲酒弈碁未嘗言功 上天威嚴重惟公抗
言直議 上亦禮重公常稱爲老先生不名又曰
卿吾子房也公與同郡葉琛胡深章溢金華宋濂
友善同出處各行其志並以功名顯於世公與濂
文章尤著楊文懿公曰子房不見詞章玄齡僅辦
符檄公勲業造邦文章傳世可謂千古人豪或疑
公逮仕胡元專門象數何異訾伊尹之屢就限周
公之多才也所著文集五十卷行於世二子長璉
考功監丞試監察御史陞江西叅政有文行次璟

爲門使陞谷府左長史璉子薦二十四年嗣伯
加祿五百石明年卒子法與璟子豹永樂二年進
太祖書詔宣德二年授豹刑部照磨卒法子拒
拒子曇曇子祿景泰三年命錄公後守臣言璉七
世孫祿幼不堪授官璟四世孫文謙可詔用祿七
年後世襲翰林五經博士天順二年勅祠公成化
十八年勅取公像祿子憲未嗣官卒弘治十三年
給事中吳士偉言公子孫宜世爵憲子瑜得爲處
州衛指揮使正德九年賜誥曰劉基學爲帝師才
稱王佐孔明之任豈間人言敬輿之謀不負所學

占事考祥明有徵驗運籌畫計動中機宜渡江策
士無雙開國文臣第一受爵能讓懷辭金蹈海之
風成功不居從辟穀封留之請可謂明哲允矣清
貞特贈爾為太師謚文成嘉靖十八年刑部郎中
李瑜言 皇上明聖斥姚廣孝 太廟侑享臣鄉
人劉基宜侑享 高廟世其封爵如徐達 上是
瑜言下廷議皆言 高帝收攬賢豪創造基業一
時佐命功臣並軌宣翼而帷幄奇謀中原大計每
每屬基故在軍有子房之稱剖封發孔明之喻基
亡之後孫薦實嗣之 太祖嘗召論再三鐵券丹

書言世祿薦嗣爵未幾旋即隕世禡圭裳於末
裔委礪帶於空言或謂後胤孤貧弗克荷負或謂
長陵紹統遂至踈嫌雖一辱塗泥傳聞多謬而載
書盟府績效具存昔者武王興滅天下歸心成季
無後為善何勸基宜侑享 太廟其九世孫指揮
使瑜宜嗣伯爵伏惟 聖明裁定制曰可公入祀
太廟庶中瑜嗣誠意伯食祿七百石與世券二
十年瑜卒

論曰中山淮陰之流亞而善保其功名誠意幾於
子房矣開平勇冠三軍岐陽恂恂若儒生閩浙皆

服其恩信寧河著績湖湘東甌守毘陵言雖不慎
而心靡二黔寧守滇南夷民懷之功不後于傳將
軍也

皇明名臣記第一卷終

子履淮校正

皇明名臣記第二卷

吾學編第二十三

學士宋文憲公

海鹽鄭曉

公名濂字景濂浦江人姪七月而生六歲能爲詩
歌稍長文學名益著初爲翰林國史編修官辭入
龍門山著書庚子徵至金陵見上問世亂柰何
對曰願明公不嗜殺人除江南儒學提舉授太子
經壬寅召講春秋左氏傳公曰春秋孔子褒善貶
惡之書遵而行之賞罰適中天下可定甲辰改起
居注侍左右明年侍上論黃石公三畧濂曰尚

書典謨帝王大經大法靡不畢具願 陛下留意
又明年乞歸省賜金帛太子贈有加還家箋謝
上書奉太子願進修德業 上覽書喜召語太子
書意洪武二年徵總脩元史除翰林學士知制誥
兼修國史時甘露屢降 上問災祥之故對曰受
命不干其天于其人休符不干其祥于其仁 上
嘗言古帝王當宴安之餘多好神仙朕謂國治民
安心神恬康即神仙也對曰漢武帝好神仙而方
士至梁武帝好佛而異僧集使移此心以求賢才
天下有不治乎三年坐議孔廟禮謫安遠知縣未

幾召爲禮部主事五年陞太子贊善大夫 上問
帝王宜讀何書公請讀真德秀大學衍義 上立
取覽說之令大書揭兩廡壁六年 上坐西廡賜
大臣坐令公講大學衍義司馬遷論黃老事講畢
復言曰漢武帝嗜神仙好邊功民力旣竭訾以重
刑幾至大亂人主能義理養性則邪說不能侵興
學教民則禍亂不能作刑罰非所先也 上曰朕
上畏天下畏兆民兢兢業業不敢自逸公離席
頓首曰願 皇上慎終如始天下幸甚陞侍講學
士兼贊善大夫令集歷代姦臣事爲辯姦錄分賜

太子諸王又命序 祖訓纂 大明日曆七年日曆成一百卷又擇言行之大者爲寶訓五卷爲序上之公侍 上又多所陳說直諫不務文飾 上喜曰卿可參大政對曰臣少無他長徒以文墨議論事 上一旦受職任事不效負 陛下頓首力辭每燕見坐賜茶詢舊章講治道甚條析至問廷臣臧否第言其善者詩文每寓忠告 上喜公善諫公深密不洩禁中語有奏輒焚稿嘗大書溫樹二字室中或問朝廷事指二字不對 上嘗強公飲醉歡笑賦楚辭一章命侍臣咸賦醉學士歌曰

後世知朕若臣同樂也九年除翰林學士承旨知制誥兼修國史 上曰朕起布衣爲天子卿自草萊列侍從爲開國文臣之首俾世世與國同休不亦美乎令太子選賜公良馬又爲良馬歌賜公時有上萬言疏者 上怒其迂衍罪且不測問群臣阿意者輒指其疏此不敬此詆謗罪當誅召公問對曰彼應詔上疏本效忠無他烏可深罪 上復覽疏顧有足采者召罵阿意者曰若等激吾怒何異以膏沃火向非宋景濂幾不誤罪言者 上嘗廷譽公曰古人太上爲聖其次爲賢爲君子若景

濂事朕十九年口無毀言身無飾行寵辱不驚始
終無異不謂君子人乎匪惟君子抑可謂賢矣十
年致仕賜緡綺御製文集太子贈衣三襲上曰
朕最慎賞嘉卿忠誠貫金石故以賜卿卿今年幾
何曰六十八上曰藏此綺三十二年作百歲衣
公頓首謝公辭請歲一朝是年九月入朝上廷
問公屢矣及至大喜日侍上遊歷觀闕盤旋禁
藥便殿待食日晏始退上歎曰純臣哉爾濂方
今四夷皆知卿名卿自愛公遜謝不敢當歲暮辭
還旣行數日上問公子璫曰朕疇昔之夜夢爾

父笑談如曩時璫曰非陛下垂念臣父切至何
以形諸夢寐公嘗曰古人爲學使心正身修措之
行事俯仰無愧而已繁辭復說道之蔽也尤篤於
倫品與人交和易任真內誠外恕一見信服汲引
後學如恐不及平居布衣蔬食無異貧士或勸爲
子孫計曰富貴一家物哉我乃所以遺之也自少
至老未嘗一時去書致仕居青羅山閉門纂述人
不見其面日本使奉勅請文獻百金卻不受上
問公對曰天朝侍從受小夷金非所以崇國體十
三年冬孫慎坐法論死公罪且不測太子力救得

釋安置茂州十四年五月行至夔卒年七十二門
人方太史曰當元之衰國朝始興也地大兵強據
名號雄視中國者十餘人皆莫能得士 太祖定
都金陵獨能聘禮太史公公始見即勸不嗜殺人
論道上前授經太子未嘗不言仁義天下既定
上方稽古制治凡郊廟山川祠祀律曆禮樂夷裔
貢賚諸禮文大政皆太史公裁定太子寬大仁明
天下歸心愛戴太史公之功居多海外諸國朝貢
接國門至必問太史公安否公墓初在夔永樂十
一年孫恪以蜀獻王命遷葬華陽置祀田正德中

謚文憲濂二子長璘璿子三人慎愷恂皆無後次
璿為中書舍人子三人懌愷恪恪居華陽懌字子
夷奉母孝獻王時賜粟帛懌力學攻書建文君召
懌入翰林為侍書

學士王忠文公

公名禕字子克義烏人幼秀爽奇敏及長長身山
立屹有偉度習古學師事黃潛戊子元政亂公為
書七八千言上時宰嫌其切直格不聞危素張起
岩並薦不報隱青巖山著書戊戌徵公署中書省
掾商略機務 上每稱子克不名聞與論文章稱

善因命采故實爲四言詩授太子辛丑進平江西
頌 上覽頌喜曰吾固知浙東有二儒卿與宋濂
耳學問之博卿不如濂才思之雄濂不如卿癸卯
授江南儒學提舉司校理外艱乙巳除侍禮郎兼
引進使定議禮制遷起居注丙午陞同知南康府
祿披榛莽建府署撫瘡殘集徙散收廩賢士搜除
姦蠹經理廢壞郡得安輯賜黃金帶丁未召議卽
位禮忤旨洪武元年降漳州府通判尋上疏曰臣
聞帝王祈天永命以爲萬世無疆之計在乎修德
而已人君修德之要有二忠厚以存心寬大以爲

政二者其大端也是故周家以忠厚開國垂八百
年之基漢室以寬大爲政成四百載之業欽惟
皇上艱難十載大業已成今日急務宜法天道順
人心夫上天以生物爲心雷霆霜雪有時而搏擊
焉有時而肅殺焉然皆暫而不常向使雷霆霜雪
無時不有則上天生物之心息矣人君體上天生
物之心故動靜之間務合乎天不然則天必示之
變異以儆戒之君能修德天意自回天眷自永臣
願 陛下法天道者此也夫君民一體古者藏富
於民取之有節近發德音減茶課免軍需民心咸

悅庶幾得遂有生之樂今浙西既平租稅既廣科
歛之當減猶有可議者臣願 陛下順人心者此
也法天道順人心則存於心者自然忠厚施於政
者自然廣大祈天永命之道未有越此者也二年
召修元史爲總裁官徵逸士汪克寬胡翰宋僖陶
凱陳基趙增曾魯高啓趙訪張文海徐尊生黃箎
傅恕王錡傅著謝懋十六人爲纂修官開句天界
寺公史事擅長裁繁剔穢力任筆削書成拜翰林
待制同知制誥兼國史院編修官三年預教大本
堂公經明理達善開道召對殿廷必賜坐從容宴

語未久奉使土蕃尋召還五年往諭雲南六月至
諭梁王 皇上聰明神聖天人所歸惟爾僻在西
南久阻聲教故遣使者來諭意亟宜奉版圖歸職
方官封如故身名俱全不然天討旦夕且至梁王
不聽館別室數日又諭曰朝廷以雲南百萬生聚
不欲殲于鋒刃曾不聞元綱解紐天兵西征不五
六年天下大定爾恃險遠屢拒明命龍驤鷁艦會
戰昆明悔無及矣梁王駭服有降意即爲改館會
元遣使脫脫至雲南覘梁王有二心迫殺我使以
固其意梁王持兩可不決匿公民間脫脫聞之誚

梁王不得已出公與脫脫相見脫脫欲屈公公罵曰天訖汝元命我朝實代之汝如燻火餘燼尚欲與日月爭光耶我將命遠來豈爲汝屈有死而已顧梁王曰汝朝殺我大兵旦夕至六年十二月竟被害瘞地藏寺北年五十二子紳字仲縉博學能文洪武二十九年走雲南求父遺骸不得述滇南慟哭記建文君即位給事中涂誠御史黃凱薦召爲國子博士預修高皇實錄與方太史友善嘗等太史爲百代儒宗勸著書淑來學太史不應紳悟遂略文藝潛心道德建文元年四月紳上言父

死節狀且曰陛下隆孝治而明詔又有旌表節義之條正微臣得展情事之時先臣志節獲伸之日也下翰林議贈公翰林院學士奉議大夫謚文節開國以來文臣有謚者寔自公始二年紳卒紳子稔亦有學行門人私謚爲孝莊先生正統六年又贈公翰林學士謚忠文公歿之明年宜興吳雲使雲南雲字友雲敏達善詞賦洪武初以故官召授弘文館校書郎改渭南丞有善政歷陞刑部郎中磨勘司令刑部尚書出爲湖廣叅政坐事被逮上憐其才釋之謂雲曰雲南未奉正朔卿能

爲朕作陸賈乎對曰天命所在誰能違之臣奉威德告以大義彼必附順若冥頑不從與師未晚七年九月遣行會雲南使鐵知院等二十人使漠北爲我獲 上釋二十人與雲俱至沙糖口二十人者謀曰吾屬奉使不達中道被執而還罪必死共說誘雲令胡服辮髮詐爲元使者又逼令改制書共給梁王雲不從以死自誓竟被害梁王遣人收雲骨瘞蜀給孤寺子黻以雲死事得入國子監弘治中徐文靖公言於朝贈刑部尚書謚忠節與公並祠雲南嘉靖中又官其曾孫承宗中書舍人

叅政陶姑孰郡公

公名安字主敬當塗人少敏悟有大志博涉史元書院山長乙未與耆儒李習率父老出城迎 上召語時事公曰今豪傑爭雄志在子女玉帛非有撥亂救民安天下之心明公率衆渡江神武不殺人心悅服以此順天人行弔伐天下不足平也 上曰善吾欲取金陵何如對曰金陵古帝都龍蟠虎踞限以長江據其形勝出臨四方何向不克 上又曰善留叅幕府習知府太平未幾公爲都事丙申從克金陵陞左司郎中贊機務旣而得劉

宋章葉四公 上問四人者何如對曰臣謀略不如基學問不如濂治民之才不如溢琛辛丑知黃州寬賦省徭招徠流亡民庶悅服甲辰移知饒州賜詩行時方征伐用急公善諭民樂輸軍興不乏乙巳信州賊攻城公與千戶朱炳率吏民分城拒守選勇卒為游兵晝夜巡捍請救江西行省公登城諭賊曰爾皆吾民反為賊用得無失計乎衆曰使皆如太守豈有今日城即破不相害會援兵至賊大敗遁去諸將怒請盡屠諸從賊者公曰民為賊脅非本心柰何殺之不許明年入朝吳元年初

置翰林院召為學士知制誥修國史時召四方名儒集議禮制公總裁定修律為議律官洪武元年上與儒臣論學術安對曰道之不明邪說害之也 上曰邪說害道猶美色眩目鮮不為惑自非豪傑不能決去夫邪說不去則正道不興正道不興天下烏得而治公頓首曰主臣探本至論 上嘗賜公對國朝謀略無雙士翰林文章第一家御史有言公隱過者 上曰朕素知安安豈有此且爾何從知對曰聞之道路 上曰御史取道路言毀譽人以此為盡職乎立黜御史初置山東行中

書省調江西叅政汪廣洋山東公出江西爲叅政
上曰朕渡江初卿首率父老見軍門爲朕陳王
道論時務深合朕心朝夕幕府裨益良多繼入翰
林益聞讜論江西上游都會擇卿撫治對曰臣微
陋恐付託不效負聖恩公寬仁達吏事政績益著
四年卒年五十七疾劇猶草上時務十二事贈姑
孰郡公國初諸禮多公裁定大祀禮專用公議禘
禘禮定於詹同齋戒禮朱升五祀禮崔亮朝會禮
劉基祝祭禮魏觀軍禮陶凱

御史中丞章公

公名濫字三益龍泉人壬辰斬黃妖寇犯龍泉執
公從子存仁公憐存仁幼願代賊聞公名大喜問
計公正色曰若等皆有父母妻子顧爲此滅族事
賊怒并執公公夜給守者乘間脫歸集里兵擊却
賊石抹宜孫平盜公有功行省授龍泉主簿
辭屢有功鄉邑歷官武德將軍僉浙東都元帥府
事皆辭結廬匡山又辟地入閩庚子 上徵公及
劉宋葉三公至建業問曰我爲天下屈四先生今
四海紛紛何時定乎公對曰惟不嗜殺人者能一
之擢僉營田司事巡行江東兩淮公乞省母病賜

金綺歸留子存厚京師浙東始設提刑按察司公
為僉事處州總制胡深出師温州還公守處州給
餉平荆楚移僉事湖廣荆襄多廢地議分兵屯田
且控制中原 上善公言河內按察使宋思顏浙
東按察使孔克仁僉事王壽坐法辭連公憂懼
上曰予素知溢守法毋恐胡深兵入閩陷沒處州
幾變陞公浙東按察副使鎮處州公辭曰臣往任
浙東無狀蒙恩獨原即陞臣官罪過益重疆場之
事臣死不避副臬之命敢辭 上從之比至諸山
寨已叛公宣布詔旨軍民感悅誅首叛者餘悉解

散青田福建寇合攻慶元龍泉公守禦却賊茗陽
賊寇隣邑遮平陽瑞安傳道公令子存道合平瑞
兵擒賊水軍千戶任惟淵朱仲欽戍青田賊至仲
欽逆戰惟淵走仲欽以無援故敗公斬惟淵狗溫
州平請朝京師 上曰卿在邊良苦俟平吳即召
卿浙西諸郡平召公且命分兵征閩以存道守處
公入見 上諭群臣曰溢雖儒臣父子宣力一方
寇盜盡平功不在諸將後因問征閩諸將對曰湯
和由海道進胡廷瑞自江西入此必勝然閩中尤
服李文忠威信若令文忠帥師從浦城取建寧此

萬全計 上立詔文忠出師如公策溫賊降授元帥還守我師征溫失利輒叛去溫既平又請降公曰叛而復降納之無法奏斬賊洪武元年拜御史中丞尋兼太子贊善大夫公務存大體不屑細故或以爲言曰憲臺百司儀表居其職者當先養人無耻使避而不犯豈直恃搏擊爲哉 上祀社稷人風雨還坐外朝大怒議禮者得罪且不測公曰風雨連朝無足爲怪即禮官失議 皇上誠敬自足昭格願賜寬霽事遂已存道部鄉兵萬五千從李將軍平閩詔存道兵從海道北征公曰鄉兵本

農人始令征閩許事平歸農復調征爽信不可上不應公又曰兵已入閩者俾還州里昔嘗叛逆者宜籍爲軍使北征自贖一舉而恩威著矣 上曰孰謂儒者迂先生強爲朕一行公至處乞終母喪不許遣存厚還治喪公集鄉兵令存道部出永嘉浮海北行三上章乞終喪得允存道出崑山走京師見 上授處州衛指揮副使戍上黨尋移平陽指揮同知公喪母哀毀疾作二年卒公性孝友誠確宏偉外若和緩至臨大事議論爭是非不避權勢必折衷於理存道征陽和遇虜斷頭山力戰

死

祭酒宋文恪公

公名訥字仲敏滑人父壽卿仕元封魏國公謚忠
肅公少承家教矩矱自檢性遲重不妄言笑齒貴
胃館師友切磋學問該博益有造詣初舉進士為
鹽山知縣中更繹騷懷寶自晦洪武十三年徵詣
公車除國子助教橫經發難擊部廓蒙學者歸嚮
嘗侍 上為詩文渾健古雅同游諸儒皆推公十
五年夏陞翰林學士時建太學 上幸學博士龔
敷執經祭酒吳顥進講 上喜召公至奉天門令

為文立碑太學是冬初置殿閣太學士公以翰林
學士為文淵閣大學士嘗寒附火燎脇下衣傷膚

上聞之為文警訥曰脇者協也聞火焚汝脇將
非汝居內相不能協助人主為政神怒耶公頓首
謝明年顥罷公自文淵閣遷祭酒會初開太學學
徒日衆師生相訐教尼不行 上簡用公特與勅
又令曹國公領監事公嚴繩準推恩義身言並教
鏟礮不遺餘力寢食學廂不復家宿一時士皆適
用 上親為制詞褒公公嘗應詔陳安邊策言屯
兵屯田之法 上嘉納公病遣中使諭卿稟天命

之性發仲尼之誠施已之幽德修道教人所以病
不病而速差以其有神也又嘗言宋祭酒骨格必
壽適有畫工至命繪公像甚肖上喜吏部尚書
余燠不喜公以事逐公去上怒誅燠已念公老
召其子望江主簿麟侍養二十三年卒於官年八
十上爲文遣官致祭故事文臣四品無給喪費
者給自公始又遣行人祭于家爲治墳塋官其次
子鄉邑訓導復祖爲司業三十年秋以張顯宗韓
克忠署祭酒司業事上因思公坐奉天門諭太
學生曰宋訥作祭酒學規嚴肅秀才循蹈規矩向

學中用朝廷以故得人訥善終朕禮送回鄉塋又
令途有司祭訥近年老秀才做祭酒懷異心不肯
教誨改廢訥學規今命年少秀才署學事違犯學
規重罪投沒頭帖謗師長者首人賞銀百兩犯者
凌遲沒產正德中謚公文恪

大學士朱文恪公

公名善字備萬豐城人少穎敏好學九歲通經史
大義能屬文元末兵亂隱山中益奮力讀書著詩
經解願史輯事繼母孝壬寅江西亂奉繼母展匿
山中洪武初爲郡學教授八年召廷試第一授翰

林修撰十二年奏對失旨謫教遼東未至放還鄉
十七年召爲翰林待詔上疏論婚姻律曰國重世
臣家重世婚今民間婚姻之訟甚多非姑舅之子
若女則兩姨之子若女蓋法不得爲婚以故讐家
誣訟或已聘見絕或旣婚復離或成婚有年兒女
成行有司逼奪使夫婦分離子母永隔冤憤抑鬱
無所控訴悲號道路感動人心議律不精禍乃至
此按舊律尊長卑幼相與爲婚者有禁若謂母之
姊妹與已之身是謂姑舅兩姨不可以卑幼上匹
尊屬若已爲姑舅兩姨子彼爲姑舅兩姨女無尊

卑之嫌爲子擇婦爲女擇婿古人不以爲非成周
之時王朝所與婚者不過齊宋陳杞四國而已故
當時稱異姓大國曰伯舅小國曰叔舅其世爲婚
姻可知至於列國齊宋魯秦晉亦各自爲甥舅之
國後世如晉之王謝唐之崔盧潘楊之睦朱陳之
好皆世爲婚媾其顯然可證者如溫嶠之玉鏡臺
以舅之子娶姑之女呂榮公夫人張氏乃待制張
昱之女待制夫人即榮公母申國夫人之姊也今
江浙此事尤多以致訟獄繁興賄賂公行風俗凋
弊願以臣章下群臣議弛其禁庶幾刑清訟簡風

俗可厚朝廷是之。上嘗諭公曰：人若能以天下之好惡爲好惡，則公以天下之智識爲智識，則明又曰：人之常情多矜己能好言，人過君子則不然。揚人之善不矜己之善，貸人之過不貸己之過。又曰：萬事不可以耳目察，惟虛心以應之；萬方不可以智力服，惟誠心以待之。公頓首稱善。十八年陞文淵閣大學士。上御文華殿，公進讀心箴畢，上曰：人心道心有倚伏之幾，人嘗持此心不爲情欲所蔽，則至公無私，自無物我之累。公頓首稱善。是年九月卒，年七十二。正德中謚文恪。是時崇德

鮑恂有名禮部主事劉庸薦恂。余詮張紳、張長年皆明經老儒，達治體，可備顧問。上遣使驛召洪武十五年冬，恂詮、長年三人先至。恂年八十餘，銓長年逾七十。上見之甚喜，賜坐顧問。退就舍一日。上召三人，命爲文華殿大學士。力辭老不任役使。上曰：念卿等皆年高，授此職煩輔道東宮，免卿等早朝日晏而入侍對，不久當聽卿等致仕。還終餘年，庶不負卿等平生學術。卿等鄉里亦爲美談。何爲固辭？皆言老且疾，辭益力。明日放還鄉紳，後至授陝西鄜州學教諭。恂純心篤行，好學能

文耕桑自食不求聞達嘗受易吳澄所著有大易傳義西漢集詮安吉人長年高郵人紳登州人皆以學行稱崇德又有貝瓊隱居爰山博通經史尤工於詩洪武初徵修元史累官國子助教博士上嘗坐奉天殿召四助教瓊及會稽趙俶錢宰金華鄭濤諭曰汝一以孔子所定書誨諸生若蘓秦張儀由戰國尚詐故得行其說宜戒勿讀

論曰文憲學行純固教太子諸王功最大忠文效節南徼姑熟首陳勘定之策中丞持憲善治民宋文恪內行修能立師道朱文恪有經術練達政體

皆宿儒長厚君子也

皇明名臣記第二卷終

子履準校正

皇明名臣記第三卷

九

吾學編第二十四

海鹽鄭

號國俞忠烈公

公名通海字碧泉巢人父廷玉第通源通淵江淮
 妖賊起時父子結寨巢湖自守左君弼據廬州輒
 窘廷玉通海聞上駐兵和陽走歸欵時上欲
 渡江得通海父子水軍甚喜率師至巢湖拔出寨
 雙刀趨謀劫上通海密白上挾兵歸營蠻子
 海牙陳兆先之戰皆火攻敗其衆通海功多陞秦
 淮翼元帥攻鎮江常州宣城敗吳呂珍進兵吳江

中流矢矢鏃不能出右目失明再破雙刀趙復池
州陞僉書樞密院事進同知從上征友諒克銅
陵搗九江掠蘄黃友諒遁還武昌還軍擊叛將祝
宗復南昌上曰吾得南昌斷友諒臂大喜已而
友諒發憤率衆圍南昌上率通海等西援友諒
解圍東出鄱陽湖逆我師大戰通海乘風火焚其
舟漢驍將張定邊者直前戰通海率飛舸射中定
邊相持數日復乘風棹七舟載葦置火藥入敵水
寨焚其戰艦數百獲僞王友仁友貴賊稍退時通
海舟深入敵寨鏖戰我師遙望久之不復見舟意

通海戰沒少頃舟飄颻出敵舟傍我師見之大
喜躍呼奮前大敗敵兵且移舟拔水寨遁去我軍
先柵罌子口及橫截左蠡遏敵歸路通海曰湖有
淺舟輒膠戰不利盍移兵入江據上游敵舟入我
直擒易耳敵見我水陸結寨不敢出糧盡益窘繞
下流欲遁通海追擊敗之友諒死班師還賜通海
田金帛攻陳理降陞中書省平章政事總兵略劉
家港平廬州攝江淮行中書省事守廬州繕墉壑
興農田兵民寧輯從征浙西克湖州轉戰至滅渡
橋中流矢卒贈豫國公改號國公謚忠烈侑享

太廟廷玉戰沒贈河間郡公通源封南安侯通淵
越雋侯語在異姓諸侯傳

越國胡武莊公

公名大海虹人長身鐵面智力過人甲午謁上
為前鋒從入和州克采石攻金陵常州大海先登
授右翼統軍元帥宿衛佐鄧將軍守宣州取徽嚴
橫槩陷陣遷樞密判官攻下蘭谿陞僉行樞密院
事收諸暨衢處廣信上以婺浙東大郡通甌引
越以公為江南行省叅政守婺州己亥克處州壬
寅苗軍元帥蔣英叛刺公并殺郎中王愷等降士

誠李將軍下杭縛英至京上命懸公像市曹刺

英血祭公贈公越國公祭卞壺廟洪武元年築壇
鷄籠山祭故功臣公位第一而祔以文臣沒王事
者李夢庚王愷孫炎等二年立功臣廟於雞籠山
定祀二十一人命死者塑其像生者虛其位時公
及馮國用趙德勝耿再成丁德興俞通海張德勝
茅成八人已卒棲神卞壺蔣子文廟六王及華高
吳良吳禎曹良臣康茂才吳復孫興祖尚存也謚
公武莊公嘗曰吾不知書吾行兵惟有三事不殺
人不虜人婦女不焚人廬舍以故所至徒兒驩附

編氓寧輯有祭征虜之風子德濟有戰功聞父難
奔計以浙東行省叅政統重兵守諸暨新城丙午
移守杭洪武三年從征莊浪失律宥復官後爲都
指揮使鎮陝西卒王愷當塗人贈當塗縣男

蔡國張忠毅公

公名德勝合肥人才畧豪邁沉毅剛果集義衆結
水寨自保與左君弼趙普勝戰不勝乙未以舟師
來歸上悅謂李丞相曰方欲渡江乏舟楫而德
勝至殆天意也上率兵拔公至和陽營于新河
授萬戶渡江拔采石取太平擒陳也先擢管軍總

管蠻子海牙陳兆先復屯方山伺太平公破之從
取集慶大破方山營擒兆先克鎮江陞秦淮翼元
帥從下常州宣州再陞僉樞密院事從下宜興普
勝陷池州公敗普勝柵江口復池州友諒犯龍江
呼諸軍力戰敗走友諒降其將張志雄梁鉉喻國
興劉世衍追友諒至采石戰歿贈蔡國公謚忠毅
侑享太廟子宣幼養子同嗣職宣長上命宣
嗣同復姓名爲汪興祖與祖以開國功封東勝侯
自有傳合肥又有周顯陳文皆驍勇顯從常將軍
李將軍有功戰歿阿暮渾河贈汝南郡伯文早喪

父奉母最孝從收吳越中原累戰功歷陞督府僉事洪武十七年卒贈東海侯謚孝勇

梁國趙武莊公

公名德勝鳳陽人狀貌魁偉膂力過人馬上運槊捷捷如飛甲午聞母在滁陽軍中遂棄妻子來歸為帳前先鋒從克和陽儀真陞總管先鋒敗方山營苗軍水寨收丹陽金壇廣德宣城轉領軍先鋒戰毘陵湖州擢左副元帥伏友諒龍江下銅陵臨山寨出淮南征高郵陞統兵元帥從破漢水寨走友諒收黃梅廣濟克瑞臨吉撫四郡旋鏖安慶降

南昌祝康據南昌叛殺葉琛從復南昌授僉江南行樞密院事臨江吉撫三城叛又復三城協守南昌統精兵為戰將癸卯漢圍南昌公出戰射殺漢金指揮漢益兵晝夜急攻城且壞公先諸將死戰且戰且築城城壞復完巡城至東門敵發蹶張弩中腰脅箭深入陸寸即拔出拊髀歎曰命也柰何大丈夫恨不能從 主上掃清中原耳卒子獻領其衆公沉鷺簡靜剛明質直馭下嚴肅號令一行旗幟改色平生未嘗讀書隨機應變智畧如神臨難不懼奮不顧身曾孫輔立功封武靖侯語在異

姓諸侯傳友諒之圖南昌也凡八十五日與公先
後死者右副指揮使劉齊右翼元帥同知朱潛統
軍元帥許圭率兵取吉安漢兵畧城三人力戰死
左翼元帥副使牛海龍突圍出戰中矢死樞密判
官李繼先左副元帥趙國昭以危急繼先出戰被
掠去死國昭引兵燒賊艦追至接橋死洪都知府
葉琛江西行省都事葉思成康祝之變琛思成迎
戰市中死臨江府同知趙天麟守臨江城城破死
管軍百戶徐明當圍城日漢設陷竄數臨城誘戰
明乘醉躍馬出城射賊賊走明追賊墮竄中賊鈎

去誘降不從死張子明者張元帥之子代父爲間
使走金陵求援還至湖城被執友諒強官之萬戶
令狗城給降子明佯許至城下大呼我張大舍已
見主上令諸公堅守救兵且至我必死幸得見
諸公賊怒即攢槊刺死張德山夏茂成皆軍士性
勇敢善戰德山以夜半潛出城焚賊舟死茂成守
城樓當賊衝中飛砲死友諒滅贈公梁國公齊彭
城郡侯海龍隴西郡伯繼先隴西郡侯圭高陽郡
侯國昭天水郡侯琛南陽郡侯天麟天水郡侯明
合肥縣男茂成總管德山千戶子明初贈武毅將

軍飛騎尉千戶後加贈忠節侯潛思成贈未詳皆
廟祀南昌公進侑享 太廟謚武莊琛麗水人博
學多才與同郡劉基章溢抗名元季從石抹宜孫
討寇有功 上下婺州見宋濂聞琛基溢皆國士
越公克處州琛避走建寧既而還麗水與基溢濂
應聘至建康處禮賢館講明經史訪論治道擢營
田司僉事壬寅知洪都府事有吏才善輯撫兵民
愛戴之

泗國耿武莊公

公名再成五河人癸巳來歸從征授百戶立功泗

滁和陽建康鎮江陞元帥守鎮江克揚州改守揚
州宜興數被吳寇又改守宜興尋還守揚州 上
取金華爲前鋒屯縉雲取處州又改守處州石抹
宜孫率衆驟至公擊敗走死先是士卒無論大小
徵私粟民間號若糶民苦莫敢誰何公白胡叅政
盡罷若糶壬寅苗帥叛公方與客飲聞變上馬收
戰卒不滿二十人迎賊罵曰俘虜奴國何負汝乃
反急解甲降不降吾斫汝萬段揮劍連斷數槩兵
不繼賊刺公墮馬大罵不絕口死子天壁糾父部
曲殺賊比至王師已誅賊贈公高陽郡公天壁嗣

守處州洪武二年進公侑享 太廟三年加贈泗
國公謚武莊

永義侯桑公

公名世傑無爲人甲午與廖俞蔡諸公結水寨巢
湖乙未納款趙普勝蓄異志公洩其謀 上得歸
和陽集商舟載勇士至黃墩攻敗普勝及蠻子海
牙 上趨入和陽諸軍大集即攻破采石鱗魚洲
鐵長官水砦取太平擒陳也先蠻子海牙遁擒兆
先入金陵拔鎮江陞秦淮翼元帥下金壇丹陽從
圍常州攻寧國常州平陞判行樞密院事取馬馱

沙克大浦口江陰下太湖收宜興尋與諸將攻江
陰石碑海寇樂瑞公奮戈躍馬陷陣死諸將大怒
奮擊盡獲海舟擒瑞 上念公贈永義侯侑享

太廟國初忠節廬有公及廖楚公俞號公蔡梁公
四人洪武六年詔定功臣謚號禮部言光武封寇
恂爲承義侯景丹奉義侯世傑侯名永義不必重
謚 上從之子敬以父故封徽先伯語在異姓諸
侯傳

太師丞相韓國李公

公名善長定遠人 上略滁陽公謁道旁留幕下

掌書記謀議軍機畫饋餉甚見親信嘗語公務輯和諸將成功一日上從容問曰四方戰鬪天下何時定乎對曰秦亂漢高帝起布衣豁達大度知人善使不嗜殺人不五載而成帝業胡元酷暴視秦尤烈以故群雄蠲奮土崩瓦解主公濠產距沛不遠與漢高帝同受山川王氣能法其所爲天下不足定也上曰漢高帝所用豪傑未有踰張良韓信蕭何三人者今徐達勇力或可方信先生可當張良蕭何乎對曰良智計絕人後世鮮比善長何敢望良若供給餽餉或可效何上曰良不可

得矣今天下才智之士可擬良者先生幸教孤孤將就見之對曰世豈乏才顧善長不能悉知惟知金華宋濂博學洽聞且知象緯上曰以孤所聞知象緯者莫如青田劉基是年滁陽王欲拔公置麾下弗肯行乙未上總兵和陽謀斷出諸將右諸將忌上公委曲調護上發采石公爲戒戢軍士榜入太平榜通衢城中肅然初置太平興國翼元帥府公爲帥府都事丙申三月從克建康籍軍民凡五十萬七月奉上爲吳國公公爲江南行中書省叅議轉給軍食戊戌上征婺州守建

康辛丑議立鹽錢茶法進叅知政事癸卯上援
南昌復征武昌皆留守甲辰奉上爲吳王陞右
相國乙巳上言湖廣邊務議江右湖廣魚課歲可
得穀一百餘萬石資餉李濟據濠公爲書招濟丙
午濟降吳元年率諸臣勸進上未許時刑獄太
繁上謂公無更連坐叅議李飲水揚希聖不職
公劾黜二人九月論平吳功封宣國公十月定官
儀尚左改左相國充總裁官定律令是月議取中
原福建廣西十二月率百官勸進明年戊申正月
上即皇帝位兼少師二月進郊社宗廟議五月

上幸汴議定都又議取元都公嘗守八月駕還上
六部官制十二月定喪服及三司朝賀東宮儀二
年正月上諸神祭禮及翰林官制二月監修元史
四月奉詔編祖訓十二月議賞平定中原功三年
正月定服色議征沙漠置司農司河南制存恤祿
養國初都先鋒十大元帥都尉指揮陣亡無後者
之父母妻禁淫祀是秋病十一月大封功臣上
諭諸將曰善長雖無汗馬之勞然事朕久給足軍
食功甚大宜進封韓國公授開國輔運推誠守正
文臣太師左丞相食祿四千石券文比公蕭何四

年正月致仕賜臨濠地墳佃戶董建臨濠宮殿七年以公第存義爲太僕丞移江南民四十萬墾濠田命公總田事八年秋南安侯監田弗勤又勅公畱鳳陽者數年子祺尚皇長女臨安公主爲駙馬都尉歲祿六百石是年廣洋陳寧劾公不問十三年正月胡惟庸辭連公群臣請逮獄上曰朕初起兵善長謁軍門曰有天日矣是時朕年二十七善長年四十一所言多合吾意命掌簿書贊計畫功成爵以上公以女與其子此吾初起時股肱心腹吾不忍罪勿問公奏還儀戶旣而仍給御史左

中丞安然老命公理臺事十四年議征漠北雲南十六年上文官封贈蔭敘例十七年河南水命祺賑恤二十三年春肅清逆黨榜列勲臣五十七人公猶在上列未幾坐罪不問會有星變其占爲大臣灾御史再劾公遂暴卒年七十七虞部郎中王國用上書訟公寃曰竊見太師善長與陛下同一心出萬死以得天下爲勲臣第一生封公死封王男尚公主親戚皆被寵榮人臣之分極矣志願足矣天下之富貴無以復加矣若謂其自圖不軌尚未可知而今謂其欲佐胡惟庸者揆之事理大謬

不然人情之愛其子必甚於愛其兄弟之子安享
萬全之富貴者豈肯僥倖萬一之富貴哉雖至病
狂亦不爲矣善長於惟庸則姪之親耳於陛下則
子之親也豈肯舍其子而從其姪哉使善長佐惟
庸成事亦不過勛臣第一而已矣太師國公封王
而已矣尚主納妃而已矣豈復有加於今日之富
貴者乎且善長豈不知天命之不可倖求取天下
於百戰而艱危也哉當元之季欲爲此者何限莫
不身爲齏粉世絕宮污僅保首領者幾人哉此善
長之所熟見也且人年邁摧頽精神意慮鼓舞倦

矣偷安苟容則善長有之曾謂有血氣之強暴動
感其中也哉又其子事陛下托骨肉至親無纖芥
之嫌何得忽有深讎急變大不得已之謀哉凡爲
此者必有深讎急變大不得已而後父子之間或
至相挾以求脫禍圖全耳未有平居晏然都無形
跡而忽起此謀者此理之所必無也若謂天象告
變大臣當災則殺人以應天象夫豈上天之意哉
今不幸以失刑而臣懼惻爲明之猶願陛下作戒
於將來也天下孰不曰功如李善長又何如哉臣
恐四方之解體也事枉寃延群臣杜口竟無一人

爲陛下言者臣誠愧耻忘其疎賤冀陛下萬一感
悟甘就鼎鑊無恨臨安公主卒于江浦棋子二人
長芳留守中衛指揮茂鎮撫旗手衛陞指揮僉事
芳子五人長恒停襲恒生城瑾城生宣宣生巒

太子太師賴國傳公

公名友德宿人初從明玉珍不得志走從陳友諒
辛丑率衆來歸從征友諒鄱陽湖被數創戰益力
殺數百人甲辰從征武昌先登向脇中矢擢雄武
衛指揮使乙巳攻安陸被九創甲午破張士誠兵
于馬騾港吳元年守徐州躍馬奮刺韓乙擒李二

拜江淮行省叅知政事大將軍北征 上曰友德
勇略冠諸軍可當一面從下沂青洪武元年從克
汴梁河南衛輝廣平獲元將爲向道克德滄州直
沽至河西務下通州克元都偵邏古北諸隘口分
兵守蘆溝橋略大同還下保定真定擣太原擴廓
帖木兒遁敗賀宗哲石州二年從取陝西三年克
沔漢是秋征甘肅還封賴川侯食祿千五百石賜
券 上欲取蜀以中山侯爲征西將軍率廖永忠
等舟師由瞿塘趨重慶公以征虜前將軍率顧時
等步騎由秦隴趨成都四年辭 上曰蜀人聞吾

西伐必悉精銳東守瞿塘址阻金牛拒我師出其
意外直搗階文門戶既藜腹心自潰兵貴神速但
患不勇耳公至陝言出金牛覘階文守備弱即趨
陳倉選鋒攀緣山谷晝夜行大軍繼之直抵階州
蜀斷白龍江橋阻我都督汪興祖躍馬直前中飛
石死公奮攻拔文州兵渡白水江遂趨綿州至漢
江造戰艦將進兵漢州欲通軍聲湯將軍爲木牌
數千書克階文綿日月投漢江順流下蜀守者見
之解體尋拔漢州夏丞相戴壽太尉吳友仁悉衆
守瞿塘聞公破階文持江油壽友仁分瞿塘守兵

還援漢州保成都未至公舟師逼漢州敗其將向
大亨城下迎擊壽兵敗之拔其城時湯將軍駐大
溪口未進 上引公冒險克階文功責湯將軍湯
將軍已獲公所書木牌遂趨夔州七月壽大亨以
成都降公湯將軍亦克重慶公分兵盡下川蜀諸
郡縣十月還京十二月論功 上曰友德統軍冒
險首克階文破綿漢成都克保寧諸郡功最大又
爲平蜀文旌公平蜀之後安輯撫禦平羗將軍御
史大夫丁玉恩信最著至今番夷稱丁大夫云五
年副馮勝征沙漠出金蘭攻甘肅至瓜沙六年復

出雁門爲前鋒虜遁軍還留鎮北平召還從太子
諸王獵荆山講武九年副湯將軍備伯顏帖木兒
延安番兵縛伯顏帖木兒以降 上將平雲南命
公巡川蜀降永寧雅播金筑普定中平乾溪等寨
還京十三年乃兒不花寇邊十四年副大將軍討
之九月朔爲征南將軍永昌侯西平侯爲副統兵
三十萬征雲南 上曰雲南遐僻取之當自永寧
始先遣驍將別軍向烏撒大軍繼自辰沅入普定
分據要害乃進兵曲靖雲南喉襟彼必併力拒我
審勢出奇取勝在此旣下曲靖三將軍一提勁兵

趨烏撒應永寧大軍直搗雲南彼此牽制彼疲於
奔命破之必矣雲南旣克分兵徑趨大理勢將瓦
解其餘可不煩兵而下公兵至湖廣遣都督胡海
洋等帥兵五萬由永寧趨烏撒公率大軍由辰沅
趨貴州進攻曲靖擒其司徒平章達里麻擊烏撒
遣副將軍趨雲南梁王走死滇池公遂城烏撒得
七星關通畢節又克大渡河降東川烏蒙芒部諸
蠻十五年 上諭公需翠輦不盡服雖有雲南亦
難守慎之公進兵克大理諸郡是年翠及宋欽皆
降蠻地悉平公因俗立法定貢賦興學校掩戰略


廣屯田南人大悅十七年還京論功進封潁國公
食祿三千石與世券十九年再征雲南二十一年
復討曲靖普安二十三年征沙漠還駐開平復征
寧夏二十四年北征哈者舍利王二十五年兼太
子太師二十七年暴卒子忠尚壽春公主爲駙馬
都尉讓金吾所鎮撫

論曰俞胡張趙耿桑六公首從義旗經營四方皇
情軫悼侑食大烝然皆殞身行間不及見一統之
盛韓公比迹蕭文終潁公取巴蜀雲南功皆第一
佐成帝業剖符上公竟不免於走狗良弓之憾功

名之際可易言哉

皇明名臣記第三卷終

子履準校正



Handwritten text in vertical columns on the right side of the page, including a prominent dark ink smudge or bleed-through.

